



Broj: 02,02,03,03/11-05-1-2252,6/17  
Sarajevo, 22. 5. 2018.

**BOSNA I HERCEGOVINA**  
**PARLAMENTARNA SKUPŠTINA BOSNE I HERCEGOVINE**  
**SARAJEVO**

PRIMLJENO 08-06-2018

Organizaciona jedinica	Klasifikaciona oznaka	Radni broj	Broj priloga

B

## Izvještaj

### Zvanična posjeta članova kolegija Doma naroda i Predstavničkog doma Parlamentarne skupštine Bosne i Hercegovine Republici Srbiji Beograd, 8 - 10. maj 2018.

Predsjedavajući Doma naroda Parlamentarne skupštine Bosne i Hercegovine (PSBiH) Ognjen Tadić, predsjedavajući Predstavničkog doma PSBiH Mladen Bosić i njihovi zamjenici: Safet Softić, Bariša Čolak, Šefik Džaferović i Borjana Krišto boravili su u zvaničnoj posjeti Republici Srbiji u periodu od 8. do 10. maja 2018. godine.

Prvi bilateralni sastanak održan je s predsjednicom Narodne skupštine Republike Srbije Majom Gojković koja je uputila pozivna pisma za posjetu Zajedničkog kolegija. Članovi rukovodstva oba doma PSBiH naglasili su da dolazak u posjetu svih šest članova kolegija Doma naroda i Predstavničkog doma jednoj državi predstavlja izraz ogromne želje i snažne opredijeljenosti Bosne i Hercegovine da s Republikom Srbijom izgradi najbolje moguće odnose.

Izraženo je zajedničko uvjerenje da će ova posjeta, kao i poruke uzajamnog poštovanja i prijateljstva koje su se mogle čuti tokom razgovora najviših predstavnika dva državna parlamenta, podstaći i unaprijediti bilateralnu saradnju na svim nivoima vlasti, te ubrzati rješavanje svih otvorenih pitanja u odnosima između dvije zemlje.

Naglašavajući simboliku posjete, koja je započela 9. maja, na Dan pobjede nad fašizmom i Dan Evrope, predsjednica Narodne skupštine Srbije Maja Gojković naglasila je da dvije susjedne i prijateljske zemlje baštine tradiciju antifašizma, te dijele vanjskopolitički cilj pridruživanja Evropskoj uniji (EU). U vezi s tim, gospođa Gojković posebno je podvukla da Bosna i Hercegovina može računati na punu podršku Srbije na putu ka EU, te dodala da Srbija želi i zalaže se za to da BiH što prije dobije status države kandidata za ulazak u EU.

Ocjenjujući da posjeta delegacije PSBiH na najvišem nivou predstavlja i naznaku da odnosi dvije države ulaze u novu fazu, koja šalje pozitivnu sliku o potrebi okretanja budućnosti i ostvarivanja saradnje za dobrobit svih naroda i građana u BiH i Srbiji, članovi dvije državne delegacije razgovarali su i o širokim mogućnostima poboljšanja ekonomske saradnje i trgovinske razmjene, kao i zajedničkog djelovanja privrednika na trećim tržištima.

U okviru dvodnevne zvanične posjete Republici Srbiji predsjedavajući Predstavničkog doma PSBiH Mladen Bosić, predsjedavajući Doma naroda PSBiH Ognjen Tadić i njihovi zamjenici:

Šefik Džaferović, Borjana Krišto, Safet Softić i Bariša Čolak sastali su se s predsjednikom Vlade Republike Srbije Anom Brnabić.

Tokom razgovora, u kojem se najviše govorilo o pitanjima unapređenja političkih i ekonomskih odnosa dvije susjedne i prijateljske zemlje, kao i o pitanjima regionalne stabilnosti, infrastrukturnog povezivanja i međusobne podrške u procesu evropskih integracija, sagovornici su zajednički konstatirali da Bosna i Hercegovina i Republika Srbija predstavljaju veoma značajne političke i ekonomske partnere čiji dobri odnosi jesu ključni za stabilnost cijelog regiona.

Potvrđeno je zajedničko opredjeljenje da međusobnom podrškom u procesu evropskih integracija BiH i Srbija nastave ulagati napor za očuvanje mira i stabilnosti, čime se, kako je rečeno, relaksiraju i unutrašnji politički odnosi u obje države. U vezi s tim, pozdravljena je činjenica da je Bosna i Hercegovina predala odgovore na Upitnik Evropske komisije, te upozoreno na to da ne bi bilo dobro da bilo koja zemlja u regionu Zapadnog Balkana zaostaje u procesu evropskih integracija.

Zajednički je naglašeno da postoji ogroman interes da se dijalogom i u što skorije vrijeme riješe sva otvorena pitanja u odnosima dvije države, posebno pitanje odnosa prema prošlosti, pitanje granice, kao i imovinsko-pravna pitanja.

Razgovaralo se i o izgradnji i trasama autoputa Sarajevo – Beograd, za koji je ocijenjeno da će biti od ogromne koristi za obje države i u političkom i u ekonomskom pogledu, posebno kad je riječ o povećanju stranih investicija. Govorilo se i o pitanju ukidanja rominga u državama regiona, što bi, kako je rečeno, bio veliki pozitivan signal i za Evropsku uniju i za sve građane država Zapadnog Balkana.

Također su spomenuta i pitanja međusobnog priznavanja diploma, olakšavanja dobivanja radnih viza, kao i pitanje usklađivanja carinskih propisa i olakšavanje prelaska granice s ciljem povećanja razmjene ljudi, robe i kapitala.

Izraženo je zajedničko uvjerenje da će ova posjeta, posebno zbog učešća svih članova kolegija oba doma PSBiH, predstavljati značajan iskorak u odnosima dvije zemlje na svim poljima.

Članovi kolegija Doma naroda i Predstavničkog doma Parlamentarne skupštine Bosne i Hercegovine okončali su zvaničnu posjetu Republici Srbiji susretom s predsjednikom Republike Srbije Aleksandrom Vučićem.

U otvorenom i sadržajnom razgovoru razmijenjeni su stavovi i mišljenja o bilateralnim odnosima dvije susjedne i prijateljske zemlje, o stanju regionalnih odnosa, kao i o procesu evropskih integracija Bosne i Hercegovine i Srbije.

Naglašen je zajednički stav o važnosti i potrebi ubrzavanja evropskog puta Bosne i Hercegovine. U vezi s tim, predsjednik Vučić istakao je da će Srbija učešćem na svim međunarodnim forumima i u tehničkom smislu pružiti Bosni i Hercegovini svaku moguću pomoć, ne mijesajući se u unutrašnja politička pitanja zemlje.

Značajan dio razgovora bio je posvećen projektu izgradnje autoputa Sarajevo – Beograd, za koji je ocijenjeno da predstavlja izuzetnu razvojnu šansu za obje zemlje, posebno u pogledu povezivanja naroda i građana, te privlačenja stranih investicija.


Istaknuto je da će oba državna parlamenta podsticati saradnju izvršnih vlasti s ciljem infrastrukturnog povezivanja, snažnije privredne saradnje, prevazilaženja carinskih barijera i ukрупnjavanja tržišta, kao i zajedničkog nastupa privrednih subjekata na tržištima trećih zemalja.

Zahvaljujući se predsjedniku Vučiću na srdačnom dočeku i prijateljskim i konstruktivnim razgovorima koji su vođeni s najvišim predstavnicima zakonodavne i izvršne vlasti Srbije, članovi delegacije BiH ocijenili su da će ova posjeta, u kojoj su prvi put bili svi članovi kolegija oba doma i koji su na najvišem nivou predstavili PSBiH, dati značajan doprinos unapređenju bilateralnih odnosa Bosne i Hercegovine i Srbije.


Članovi rukovodstva oba doma PSBiH naglasili su da je u interesu obje zemlje da se posjete i razgovori na najvišim političkim nivoima nastave s ciljem da se u što skorijem periodu dijalogom dođe do rješenja svih otvorenih pitanja. Takav razvoj događaja, rečeno je, označio bi novu fazu u odnosima dvije zemlje koja znači okretanje ka budućnosti i slanje pozitivne poruke o boljim odnosima među svim državama u regionu.

Izvještaj odobrio:

Predsjedavajući Predstavničkog doma  
Parlamentarne skupštine BiH  
Mladen Bosić



Predsjedavajući Doma naroda  
Parlamentarne skupštine BiH  
Ognjen Tadić



Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- a/a